




Katika kijiji kimoja,  
kulikuwa na mvulana  
aliyeitwa Abula.

Abula hakupenda kusoma  
wala hata kufungua  
kitabu. Licha ya kuwa  
mwanafunzi mvivu  
alikuwa na tabia mbaya.




Abula alizoea kuiba pesa za mamake na kununua peremende. Hata mama alipozificha, Abula alizipata.

Alipomaliza kula peremende, Abula angeenda kucheza na marafiki zake.



Baada ya muda, Abula aliacha kwenda shuleni. Alicheza mchana kutwa na kurudi nyumbani jioni.

Mamake alipogundua jambo hilo, alikuwa na wasiwasi.




Mama alimwambia mumewe, “Mtoto wetu amekuwa mtukutu. Nadhani hata haendi shuleni. Pia ananiibia pesa.”

Baba aliwaza juu ya njia mwafaka ya kubadilisha tabia za Abula.




Alimwambia mkewe,  
“Wakati mwingine, zifiche  
pesa zako katika kurasa za  
kitabu. Kwa vile yeye  
hafungui vitabu, pesa  
zako zitakuwa salama  
pale.”



Siku iliyofuata, Abula alitafuta pesa za mamake kila mahali lakini hakupata chochote.

Aliamua kwenda soko iliyokuwa karibu kuona kama angepata pesa zozote.



Baba aliona kule Abula alikuwa akienda.

Alisema, "Mwanangu, ninajua kwa nini unakwenda sokoni. Sasa rudi nyumbani ukatafute pesa kwenye vitabu."



Abula alishangaa, lakini alikwenda nyumbani akatafuta kwenye vitabu.

Alizipata pesa ambazo mamake alikuwa ameficha.





Siku iliyofuata, Abula alitafuta tena kwenye vitabu. Lakini, hakuna pesa zozote zilizokuwa zimefichwa humo.

Alimwuliza babake kwa nini hakupata pesa zozote kwenye vitabu.



Babake alitabasamu kisha akamjibu, “Mwanangu, je, ungependa upate pesa nyingi za kununua vitu vingi vitamu?”

Abula alimjibu, “Bila shaka, baba.”



Babake alisema, "Nisikilize vizuri. Soma vitabu vyako na uhudhurie shule. Utapata zawadi nyingi kwenye vitabu. Usikate tamaa."

Abula alijibu, "Lakini baba, kusoma ni kazi ngumu. Vitabu vinachosha mno!"



Baba aliwaza juu ya kumhamasisha mwanawe. Alimwambia Abula, "Hebu tusome pamoja. Nitakusaidia upate mali vitabuni."

Abula alisoma kwa bidii. Mwishoni, alifaulu na kuishi maisha mazuri.